

ՎԱԿ ՄԻՋՆԱԴԱՐԻ ՀԱՅ ԺԱՐՏԱՐԱՊԵՏՈՒԹՅԱՆ ԳՄԲԵԹԱՎՈՐ
ՔԱՌԱԹԵՎ ԵՐԿՈՒ ՀՈՒՇԱՐՁԱՆ

Վ. Գ. ԳՐԻԳՈՐՅԱՆ

Վաղ միջնադարի կենտրոնազմբեթ մեծ շինությունների հետ մեկտեղ մեզ հասել են նաև շորս տասնյակից ավելի փոքրածավալ, գմբեթավոր քառաթև հուշարձաններ, որոնք ըստ իրենց ներքին հատակագծային լուծման առանձնահատկությունների բաժանվում են երեք հիմնական խմբի՝ քառախորան, եռախորան և միախորան։ Միախորան (երեք ուղղանկյուն խաչաթևով) խմբին են պատկանում նաև քննարկվող հուշարձանները, որոնք հատակագծային համաչափություններով և կառուցվածքային որոշ տարրերի նմանությամբ առանձնանում են նշված խմբի մյուս շինություններից։ Ինչպես այս, այնպես էլ նույն ժամանակաշրջանում կառուցված լինելու հանգամանքը թույլ է տալիս տարածքով իրարից անշատ հուշարձանները ներկայացնել համատեղ։

Պատմական Հայաստանի Տաշիր վերին գավառի Արշովիտ¹ (այժմ Սպիտակի շրջանի Ղուրսալի) գյուղում է գտնվում քննվող հուշարձաններից առաջինը (նկ. 1), որի մասին առհասարակ ոչ մի տեղեկություն չունենք։ Ս. Զալալյանցը միայն հիշատակում է, որ գյուղում կա «...հոյակապ եկեղեցի անուն սրբոյն Դէորգեայ, կառուցեալ սրբստաշ քարամբք անդէն ավերակ...»²։ Իսկ Ն. Մ. Տոկարսկին հուշարձանների համեմատական աղյուսակում նշում է շինության հատակագծի և քիվի ձևերը³։

Հուշարձանը տեղագրվել է սարալանջին փռված գրուղի հյուսիս-արևմուտյան կողմի համեմատաբար հարթ տեղում։ Այն կառուցվել է կարմիր, դարչնագույն, սև և դրանց տարբեր երանգների մաքուր տաշված տուֆից, որը հողմնահարվելով այժմ մոզ դարչնագույնի տպավորություն է թողնում։ Թե՛ ներսից և թե՛ դրսից պատերը շարված են համաչափ շարքերով (մոտ 0,60 մ բարձրությամբ), բացառությամբ բացվածքների, ուր քարերը ազուցված են միմյանց։ Պատերի հաստությունը 0,95—1 մ է։ Կրաբետոնի լիցքի մեջ օգտագործված են գետի մանր և միջին մեծության ավազահատիկներ։ Հուշարձանն այժմ 1—1,5 մ խորությամբ թաղված է հողի մեջ։ Պահպանվել է միայն հիմնական ծավալը՝ մինչև գմբեթակիր կամարները, այն էլ ոչ բարվոք վիճակում։ Ներսում թափված է խորանի աջակողմյան, հարավային և արևմտյան դռների երկու կողմերի, հյուսիս-արևմտյան պատի երեսուպատման քարերի մի մասը։ Չկան հարավային ճակատի լուսամուտի և դռան երեսուպատման, աբակային դռան երկու կողմերի և լուսամուտների վերին երեսուպատման քարերը։ Չորս խաչաթևերում էլ լուսամուտների առանցքով պահ-


¹ Շնորհակալությամբ հայտնում ենք, որ գյուղի պատմական անվանը տեղեկացանք ակադեմիկոս Ս. Երեմյանից։

² Ս. Զալալյանց, Ճանապարհորդություն ի մեծն Հայաստան, Տիֆլիս, 1853, էջ 103։

³ Н. Токарский, Архитектура Армении IV—XIV вв., Ереван, 1961, էջ 168,

տերը ճաքել են (Հյուսիսային պատի ճաքին նպաստել է նաև լուսամուտի տակի բավական մեծ քանդվածքը), այնպես, որ թույլ երկրաշարժի դեպքում հուշարձանը կարող է լրիվ ավերվել:

Հատակագծային հորինվածքով Արջովիտի ս. Գևորգ եկեղեցին պատկանում է գմբեթավոր քառաթև փոքր կառույցների խմբին (նկ. 2): Գմբեթատակ քառակուսին երեք կողմից շրջապատված է ուղղանկյուն խաչաթևերով, իսկ արևելյան մասից՝ թեթևակի պայտաձև հատակագիծ ունեցող խորանով:



Նկ. 1. Արջովիտ գյուղի ս. Գևորգ եկեղեցու տեսքը հյուսիս-արևմուտքից:

որն արտաքինից նույնպես ներառված է ուղղանկյուն պատերի մեջ, խորանը ծածկված է գմբեթադրով, իսկ մնացած խաչաթևերը՝ բավական շեշտված պայտաձև թաղերով: Այդ թաղերը երիզող զույգ պայտաձև կամարների վրա էլ բարձրացել է հուշարձանը պսակող գմբեթը: Կամարների հատման տեղում, հատկապես հյուսիս-արևմտյան և հարավ-արևելյան անկյուններում, գեոևս պահպանված տրոմպի ներքին քարերը վկայում են, որ քառակուսուց դեպի թմբուկ անցումը իրականացված է եղել տրոմպների միջոցով: Հուշարձանը հիմնականում լուսավորվում է չորս խաչաթևերի կենտրոններում առկա լուսամուտներից: Ուշագրավ լուծում ունեն արևելյան և հարավային խաչաթևերի մուտքերը: Արևմտյան՝ հիմնական մուտքի լայն բացվածքը դրսից ունի հորիզոնական, մեկ ամբողջական քարից բարավոր, որի վրա հանգչում է պարզ տրամատներով շեշտված պայտաձև կամարը: Մուտքը համանման լուծում ունի նաև ներսից: Երկու կողմից էլ բարավորի և կամարի միջև քարեր են ագուցված, որոնցից արտաքինն այժմ թեքված է ներս և պարզորոշ երևում է, որ կամարի կողը հենց սկզբից սրբատաշ է եղել: Այս հանգամանքը, ինչպես նաև կողի վրա պահպանված կարմիր ներկի հետքերը հիմք են:

տալիս ենթադրելու, որ այդ քարերը (որոնց վրա կան եղծված արձանագրության հետքեր) հետագայում են ագուցվել, և գուռը նախկինում ունեցել է միջանցիկ կամարամահիկ (լյունետ), ինչպես Ավանի կաթողիկեն (VI դ.):

Բայց, ի տարբերություն Ավանի և Երերուլքի, այս հուշարձանի մուտքի պայտաձև կամարը դուրս չի գալիս պատի հարթությունից և չի հանգչում մուտքի երկու կողմերի որմնասյուների վրա: Այս առումով Արշովիտի գուռն ավելի հնաձև է, որովհետև միայն IV—V գգ. սկսած մուտքի բարավորների շուրջը ստեղծվեցին մեկական կամ երկուական որմնասյուներ⁴:

Հետաքրքիր է լուծված նաև հարավային մուտքը: Ներսում հորիզոնական բարավորի վրա նստած է նույնպես միակտոր հորիզոնական սալ, որի ներքին մասում, դռան բացվածքի շափով, 0,04—0,05 մ բարձրությամբ, փորված է բեռնաթափող ճեղք: Այս երկու քարերին համապատասխանող արտաքին քարերը ընկած են, սակայն կրաբետոնի վրա պահպանված հետքերի շնորհիվ կարելի է նկատել, որ բարավորին համապատասխանել է նույնատիպ հորիզոնական սալ: Սրա վերին շարքում, դռան ուղիղ կենտրոնում պահպանվել է մոտ 0,20 մ հաստություն ունեցող կիսաշրջանաձև կրաբետոնի շաղախ: Դժվար չէ կռահել, որ ներքին՝ բեռնաթափող ճեղք ունեցող հորիզոնական սալին արտաքինից համապատասխանել է կիսաշրջանաձև, թերևս պայտաձև կամար, իսկ բարավորի և կամարի միջև բար է ագուցված եղել: Եվ հենց այս կամարի ու բարի միջև կաղապարված կրաբետոնն է, որ կիսաշրջանաձև, որոշակի հաստությամբ պահպանվել է և այժմ պարզորոշ երևում է: Մի խոսքով՝ արտաքուստ այս մուտքը լուծված է եղել ճիշտ արևմուտյան դռան օրինակով, այն տարբերությամբ միայն, որ հենց սկզբից էլ միջանցիկ կամարամահիկ չի ունեցել: Կառուցվածքային առումով արևմտյան և հարավային դռները նույնատիպ լուծում ունեն նաև ներսից: Հարավային դռան բեռնաթափող ճեղքի շնորհիվ հորիզոնական սալը ծառայում է որպես կամար՝ սալի վրա իջնող ուղղահայաց բեռը փոխանցելու նրա ծայրերին: Այս լուծումը նույնպես հին է (լեռնակերտ IV դ., Երերուլք V դ., Ավան VI դ.):

Յուրահատուկ են լուծված նաև լուսամուտների բացվածքները: Հորիզոնական կտրվածքում լուսամուտները դեպի ներս լայնանում են: Ուղղահայացում՝ նրանց ներքին մասերը հորիզոնական են⁵, իսկ վերին մասերը, շնորհիվ երկու տարբեր շառավիղ ունեցող վամարների, լայնանում են դեպի ներս (ընդ որում դեպի ներս նայող կամարի շառավիղը ավելի մեծ է):

Հետաքրքիր է, որ բոլոր լուսամուտների վերին կամարաձև մասերը կիսաշրջանից փոքր են, այսինքն՝ կամարի կենտրոնը տեղագրված է նրա հիմքերը միացնող հորիզոնական գծից ներքև:

Ուշագրավ են հուշարձանի լուսամուտների պսակների լուծումները: Արևմտյան և հյուսիսային պսակները համակենտրոն լինելով լուսամուտների վերին բացվածքներին, չեն ընդգծվում⁶: Այլ կերպ է լուծված արևելյանը: Այն վերին բացվածքի հետ ոչ թե համակենտրոն է, այլ լրիվ կիսաշրջան, որով,

⁴ Անկնարկ հայ ճարտարագիտության պատմության, Երևան, 1964, էջ 97:

⁵ Միայն հյուսիսային լուսամուտն է դեպի ներս լայնանում և դժվար չէ նկատել, որ այն փորված է հետագայում ու շատ անփութորեն:

⁶ Հավանաբար, նման լուծում ունեցել է նաև հարավային պսակը, որն այժմ չի պահպանվել:

կարծես, ընդգծվում է խորանը լուսավորող լուսամուտի դերը հարթ ճակատի վրա: Առանձնակի ուշադրություն է արժանի պսակի և լուսամուտի միջև ընկած հատվածի մշակումը. մի բան, որ չենք հանդիպում վաղ միջնադարի հայկական ճարտարապետության և ոչ մի հուշարձանում:


Արևելյան պսակը պայտածե կամարիկներով մշակված, ուղղանկյուն կրտրվածքով հարթ սալ է: Նրա աջակողմյան վերին մասում քանդակված է շրջանի մեջ ներգծված վեցթերթ վարդյակ՝ հար և նման Ծղվարդի (V դ.) բազիլիկայի հարավային մուտքի բարավորի կենտրոնում զետեղվածին: Արևմտյան լուսամուտի քանդակազարդ պսակը մեզ է հասել բավական վնասված, թեև տեղ-տեղ պահպանվել է նրա մակերեսով ձգվող պայտածե կամարիկների և դրանք երիզող գնդիկների գոտին: Հյուսիսային լուսամուտի պսակը ավելի պարզ է. այն ունի զույգ կիսազանիկներից կազմված տրամատ՝ առանց զարդաքանդակների: Հուշարձանի զարդատարրերից պահպանվել են նաև քիվի որոշ քարեր արևմտյան խաչաթևի հյուսիսային և հարավային անկյուններում: Դրանք V—VII դդ. տարածված, ստորին մասում պարզ տրամատ ունեցող հարթ սալեր են՝ հարդարված այնքան շեշտված պայտածե կամարիկներով, որ գրեթե շրջանագծեր են դառնում:

Հուշարձանի հարավային ճակատում, լուսամուտից աջ, պատի շարվածքի մեջ տեղադրված է 1,90×0,35 մ չափերով միակտոր քար: Նրա կենտրոնում քանդակված է շրջանի մեջ ներգծված խաչ, որն առնված է ցածից դեպի վեր լայնացող «թևերի մեջ»: Խաչի երկու կողմերում, շրջանի մեջ, փորագրված են վարդյակներ: Դժվար չէ նկատել, որ այս զարդաքանդակները արվել են նախքան քարը պատի շարվածքի մեջ դնելը (աջակողմյան վարդյակի վերին մասը տաշված է): Այդ քարը իր գույնով, չափերով, զարդաքանդակներով և դրանց մշակման տեխնիկայով նման է արևմտյան դռան բարավորին: Թերևս այդպիսի մի խաչ կամ սրբապատկեր էլ եղել է արևմտյան դռան բարավորի կենտրոնում, որն անհետացել է հետագայում արված ուղղանկյուն փորվածքի պատճառով: Բարավորի վրա (աջում) կա շրջանի մեջ ներգծված վեցթերթ վարդյակ, իսկ ձախում՝ ումբաձև զարդաքանդակ:


Հարավային պատի մեջ տեղադրված քարի զարդաքանդակները հիշեցնում են Երեբունյի հարավային դռան բարավորը, որը նույնպես ունի շրջանի մեջ ներգծված հավասարաթև խաչ՝ պարփակված ներքևից լայնացող թևերով: Այս փաստը հնարավորություն է տալիս ենթադրելու, որ ինչպես արևմտյան բարավորը, այնպես էլ հարավային ճակատում շարվածքի մեջ տեղադրված քանդակազարդ քարը քրիստոնեական շրջանի առաջին դարերին պատկանող, նույն տեղում կամ շրջապատում եղած որևէ կառույցի քարերից են, որոնք, թեև վնասված, բայց օգտագործվել են Արշուրիտի հուշարձանում:

Հայկական ճարտարապետության մեջ տակավին V դ. նշանակալից տեղ էր գրավում բազմերանգ տուֆաքարը⁷: Որպես զարգամիջոց օգտագործվում էր նաև ներկը: Վաղ շրջանի ճարտարապետական կառույցներում որոշ մանրամասեր ներկվում էին: Այսպես, օրինակ, Երեբունյում կարմիր և դեղին են ներկված հարավային սյունաշարի արևելյան, վերջին որմնասյան խոյակն ու

⁷ Տե՛ս «Աննարկ հայ ճարտարապետության պատմության», էջ 132:



Նկ. 2. Արշովիւ գլուխի ս. Գևորգ եկեղեցի. ա) արևմտյան ճակատը, բ) հատակաքիթը, գ) ընդլայնական կտրվածքը, դ) լուսամուտների երեսակալները, ե) հարավային մուտքը ներսից, զ) պահուսակ, է) հարավային ճակատի քանդակազարդ քարը:



Նկ. 3. Նոր Կյանք գյուղի եկեղեցու հյուսիսային ճակատը, ընդերկայնական կտրվածքը և հատակագիծը:

արևմտյան դռան կիսաշրջանը⁸, Քասաղում՝ հարավային և արևմտյան դռների բարավորների ազատ մակերեսները⁹: Կարմիր և դեղին է ներկված Արշովիտ գյուղի հուշարձանի արևելյան լուսամուտի պսակը, որի պայտածե կամարիկների մեջ պարզորոշ երևում են շնարակի նման փայլող դեղին ներկի մնացորդներ: Ներկի հետքեր կան նաև արևմտյան լուսամուտի պսակի, դռան բարավորի և պայտածե կամարի վրա:

Հետաքրքիր են մշակված հուշարձանի մանրամասները: Սովորաբար դրմբեթակիր զույգ կամարների դեպքում գմբեթատակ քառակուսու պարզ անկյունները ստանում են լրացուցիչ ելուստներ, որոնց վրա էլ հանգչում են վերին կամարները: Սակայն Արշովիտում վերջիններս այնքան նեղ են, որ եթե իջնեին մինչև իմպոստները, ապա գմբեթատակ քառակուսու անկյուններում ստացվող լրացուցիչ ելուստը կլինելու շատ աննշան և անտեղի: Դրանից խուսափելու համար էլ երկրորդ կամարները հանգչում են իմպոստներից վեր տեղադրված պահուսնակների վրա, հիշեցնելով Մաստարայի և Ավանի լուծումները: Արշովիտում դրմբեթակիր կամարների իմպոստները որմնասյան հարթությունից դուրս են դրված, որը նույնպես բնորոշ է վաղ շրջանի հուշարձաններին (Ներքույք, Աշտարակի Ծիրանավոր, Ավան):

Այս ամենից հետո դժվար չէ նկատել, որ Արշովիտ գյուղի ս. Գևորգ եկեղեցին իր հատակագծային լուծման համաչափություններով, ճակատների և առանձին մանրամասերի մշակումով առանձնահատուկ տեղ է գրավում նույնատիպ հուշարձանների շարքում: Թաղերի պայտածությունը, մուտքերի և լուսամուտների ձևերն ու նրանց կառուցվածքային լուծումները, զարգանալի հարդարանքը, կառուցողական տեխնիկան և այլ մանրամասեր հատուկ են հայ դասական ճարտարապետության հուշարձաններին: Եվ եթե նրմանությունը V դ. հուշարձանների հետ կարելի է բացատրել ավանդական տարրերի ընդօրինակմամբ, ապա բազմաթիվ հնատիպ ձևերի միաժամանակյա օգտագործումը բացառում է նման հնարավորությունը և թույլ է տալիս Արշովիտի ս. Գևորգ եկեղեցին թվագրել VI դ. կեսով:

Վաղ միջնադարի հայ ճարտարապետության մյուս արժեքավոր հուշարձանը գտնվում է Արթիկի շրջանի Նոր Կյանք գյուղում (նկ. 4): Մասնագիտական գրականության մեջ այն առաջին անգամ ներկայացրել է Թ. Խորամանյանը¹⁰: Հուշարձանը համառոտ նկարագրվում է Հ. Ստրժիգովսկու¹¹ և Գ. Զուբինաշվիլու¹² աշխատություններում: Նշված ուսումնասիրություններում շինությունը ներկայացված է առանց չափազորությունների:

XIX դարում եկեղեցական նոր շենքեր կառուցելիս օգտագործվում էին ռակավին կանգուն փոքր խաչաձև եկեղեցիները՝ հավելելով երկթեք ծածկով, երկայնական երկշարք փայտյա սյուներով դահլիճներ¹³: Այսպիսի մի (7,15×

⁸ Н. Марр, Ереуйская базилика, Ереван, 1968, էջ 12, 15.

⁹ Ա. Սահյան, Քասաղի ռազիլիկան, Երևան, 1955, էջ 78.

¹⁰ Թ. Խորամանյան, Նյութեր հայկական ճարտարապետության պատմության, Երևան, 1942, հ. 1, էջ 246, հ. 2, էջ 137, 139, 203, 204.

¹¹ J. Strzygowski, Die Baukunst Armenier und Europa, Wien, 1918, էջ 99.

¹² Г. Чубинашвили, Разыскания по армянской архитектуре, Тбилиси, 1967, էջ 69.

¹³ Տե՛ս «Անարկ հայ ճարտարապետության պատմության», էջ 244.

ժ, 55 մ. շափերի) ուղղանկյուն կառույց էլ կցվել է հիշյալ հուշարձանի արևմտյան խաչաթևին: Դժվար չէ նկատել, որ դահլիճի կառուցման ժամանակ հուշարձանի գմբեթը թմբուկի հետ միասին չի պահպանվել, իսկ արևելյան և հարավային ճակատների վերին երեսպատման քարերի մեծ մասը թափված է եղել: Հենց այս ժամանակ էլ գմբեթի փոխարեն, գմբեթակիր կամարների վրա, ուղղանկյուն կտրվածք ունեցող գերաններից փայտե ծածկ են դրել՝ ժողովրդական տներում լայն օգտագործում գտած հազարաշենի ձևով: Իսկ արևելյան և հարավային ճակատների վերանորոգման հետ մեկտեղ, խաչաթևերի երկթեք ծածկերի փոխարեն, նրանց արտաքին եզրագծով, քիվերի վրա շարքեր են ավելացրել, այդպիսով գմբեթատակ քառակուսին խաչաթևերի հետ առնելով ընդհանուր ծածկի տակ¹⁴:

Հուշարձանը նոր ժամանակներում կրել է որոշ փոփոխություններ. քարե շարվածքով փակել են հյուսիսային մուտքը, իսկ արևմտյան գլխավոր մուտքը փոխարինել են խաչաթևերի ամբողջ լայնությամբ ձգվող կամարաձև բացվածքով: Գլխավոր խորանում կառուցվել է բարձր բեմ՝ հյուսիս-արևելյան և հարավ-արևելյան պատերին հարող շատիճաններով: Արևելյան և հարավային խաչաթևերի վրա բացվել են ոչ սրբատաշ կողերով լուսամուտներ: Պարզ է, որ այս «անհարթությունը» պիտի վերացվեր սվաղով, որի հետքերը պատերի վրա այսօր էլ կան: Այս փոփոխությունների թվին է պատկանում նաև այժմյան քարե սալահատակը:

Հատակագծային լուծմամբ այս կառույցը ևս պատկանում է գմբեթավոր քառաթև փոքր հուշարձանների խմբին (նկ. 3): Հորինվածքի հիմքը կազմող գմբեթատակ քառակուսին չորս կողմից շրջապատված է ուղղանկյուն խաչաթևերով, որոնք ներսում, բացի արևելյանից, ուղղանկյուն եզրագիծ ունեն և ավարտվում են պայտաձև թաղերով: Արևելյան խորանը կիսաշրջանաձև հատակագիծ ունի և ավարտվում է գմբեթարդով: Անցումը քառակուսուց դեպի թմբուկ իրականացված է միաշերտ գմբեթակիր կամարների անկյուններում տեղադրված առաջաստների և նրանց մեջ փողված տրոմպների միջոցով: Այս փոխանցման շնորհիվ, հենց գմբեթատակ կամարների վրա ստեղծվել է շրջանաձև այն հիմքը, որի վրա ժամանակին բարձրացել է ներսից գլանաձև թմբուկը:

Գմբեթատակ քառակուսու արտաքին անկյունները մնացել են ծածկի տակ, այդ պատճառով էլ հնարավորություն չունենք հավաստելու թմբուկի ձևը: Գմբեթատակ քառակուսին, հավանաբար կրել է ութանիստ թմբուկ, ձիշտ այնպես, ինչպես ներքին Թալինի ս. Քրիստափոր եկեղեցին (VII դ.), որի ներքին գլանաձև թմբուկը արտաքինից ութանիստ է:

Հուշարձանը նախկինում լուսավորվել է միայն արևմտյան և հարավային խաչաթևերի՝ դեպի ներս լայնացող լուսամուտներով: Ունեցել է երկու մուտք՝ հյուսիսային և արևմտյան խաչաթևերին:

Շինության հիմնական ծավալը բարձրանում է երկաստիճան որմնախարիսխի վրա¹⁵: Կարմիր, դարչնագույն, սև և դրանց տարբեր երանգների սըր-

¹⁴ Սակայն այդ ծածկը չի պահպանվել: Այդ է վկայում Թ. Թորամանյանի լուսանկարը: Ներկայիս ծածկը արված է մի քանի տասնամյակ առաջ տեղացիների կողմից՝ հուշարձանը իբրև պահեստ օգտագործելու նպատակով:

¹⁵ Արևելյան խաչաթևի միայն հյուսիսային անկյունում երևում է սրբատաշ տուֆի մի շարք:

րատաշ տուֆե պատերը, թե՛ ներսից և թե՛ դրսից արված են կանոնավոր շարքերով, որոնց հորիզոնական կարանների վրա պարզորոշ երևում են 45° խորություն փորված եզրակոսները:

Հուշարձանի զարդանախշերից քիչ բան է մնացել: Չնայած հյուսիս-արևելյան անկյան քիվի քարերի առկայությանը, նրանց, ինչպես նաև հյուսիսային և արևմտյան լուսամուտների պսակների երբեմնի հարդարանքը չի պահպանվել: Միայն հյուսիսային դռան բարավորի կամարի երեսակալի ու յոթ քարեր կրում են հարդարանքի հետքեր, որոնք ներքևից կիսազնդիկներով երիզված հարթ կամարիկներ են: Պահպանված հարդարանքի մյուս նմուշը, ուսյն բարավորի կենտրոնում քանդակված, շրջանի մեջ առնված հավասարաթև խաչն է:

Հյուսիսային դռան երկու կողմերում, ինչպես նաև բարավորի և կամարի վրա կան մի քանի արձանագրություններ: Կամարի արձանագրությունը թվագրված է ՆԾԲ (1003), իսկ դռանից աջ՝ ուռուցիկ տառերով՝ ՆԺ (961): Արձանագրությունները հուշարձանի շինարարությանը չեն առնչվում, ուստի կառույցի թվագրումը հնարավոր է նույնատիպ, ինչպես և այլ հորինվածքի վաղ միջնադարյան կառույցների համագիր քննությանը:

Թ. Թորամանյանը հուշարձանը դասել է VII դ. կառույցների շարքը¹⁶: Այս թվագրումը ընդունվել է նաև Հ. Ստրժիգովսկու կողմից¹⁷:

Գ. Չուբինաշվիլին չի բաժանում այս կարծիքը¹⁸: Սակայն հարցի առումով չափազանց արժեքավոր են Թ. Թորամանյանի 1913 թ. հունիսի 20-ի ճանապարհորդության ժամանակ արած դիտողությունները՝ նամակով ուղղված Ն. Մառին. «Ճանապարհի շուրջը 7—8 վերստ մնալով մտա Մաջիթլու քաղաք գլուղը, որտեղ կա մի հին եկեղեցի: Այս եկեղեցին թեև բոլորովին նախնական վիճակի մեջ չէ մնացած, արևմտյան կողմի քանդվել է և վրան հավելվածներ են արած, սակայն ըստ ինքյան ձևացած մասերը ցույց կուտան, թե մինչև 7-րդ դար գոյություն ունեցող ռեին կպատկանին»¹⁹:

Հուշարձանն ի՞նչ աղբյուրներ ունի մինչև VII դ. գոյություն ունեցող ճարտարապետական ոճի հետ: Դժվար չէ նկատել, որ հատակագծային հորինվածքով և առանձին մանրամասների լուծմամբ կառույցը զգալիորեն տար-

Որմնախարսխի հետ նույն հարթության մեջ գտնվող այդ շարքը արված է տեղանքի թեքության պատճառով: Հ. Ստրժիգովսկին թերևս այս շարքն է նկատի ունեցել, որ որմնախարսխը համարել է եռաստիճան: Տե՛ս J. Strzygowski, նշվ. աշխ., էջ 99:


¹⁶ Թ. Թորամանյան, նշվ. աշխ., հ. 1, էջ 137, 246:

¹⁷ J. Strzygowski, նշվ. աշխ., էջ 99:

¹⁸ «Մի քանի ալլ արձանագրությունների կողքին, հյուսիսային լուսամուտի աջ կողմում պահպանվել է Սարգիս կաթողիկոսի շինարարական արձանագրությունը, — գրում է նա, — 469 թ. հայոց թվագրության, այսինքն, 1020 թվականին...» (Г. Чубинашвили, նշվ. աշխ., էջ 69): Վերը նկատեցինք, որ հուշարձանի արձանագրություններից և ոչ մեկը շինարարական չէ: Դրանց մեջ կան նաև մինչև X դ. հասնող ռեզանդան նվիրատվությունների և հարկաբաշխման վկայություններ: (Տե՛ս Թ. Թորամանյան, նշվ. աշխ., հ. 1, էջ 246, հ. 2, էջ 137: Ուրեմն, ըստ Չուբինաշվիլու ստացվում է, որ դեռևս X դ. կանգուն և նվիրատվությունների արձանագրություն կրող եկեղեցին կառուցվել է XI դ. 20-ական թվականներին: Տեղին է հիշատակել Հ. Ստրժիգովսկու այն կարծիքը, թե՛ «Կարմիր քարի վրա 1001 թ. և X դ. բազալտի վրա արված արձանագրությունները մատնանշում են կառույցի վաղ ժամանակաշրջանը (տե՛ս նշվ. աշխ., էջ 99):

¹⁹ Թ. Թորամանյան, նշվ. աշխ., հ. 2, էջ 203: (Ընդգծումը մերն է):

բերվում է Հայաստանի VII դ. գմբեթավոր քառաթև փոքր հուշարձաններից։ Հատակագծային լուծման և նույնիսկ շափերի առումով այն նման է միայն Արջովիտի ս. Գևորգ եկեղեցուն։ Եթե Արջովիտում գմբեթատակ քառակուսու չափերն են $4,05 \times 4,00$ մ, ապա նոր Կյանքում՝ այն $4,20 \times 4,23$ մ է, ինտերիերում գլխավոր առանցքային շափերը Արջովիտում կազմում են $9,15 \times 7,36$ մ, նոր Կյանքում՝ $9,45 \times 7,50$ մ։ Հյուսիսային և հարավային խաչաթևերի խո-



Նկ. 4. Նոր Կյանք գյուղի եկեղեցու տեսքը հյուսիս-արևելքից։

րությունը Արջովիտում՝ 1,62 մ է, նոր Կյանքում՝ 1,64 մ։ Արջովիտի հետ այս հուշարձանի նմանությունը ի հայտ է գալիս և դռան կոնստրուկտիվ լուծմամբ։ Այստեղ դռան ուղղանկյուն բացվածքը ունի հորիզոնական բարավոր, որի վրա հանգչում է կիսաշրջանաձև կամարը։ Կամարի և բարավորի միջև, դեպի ներս 0,33 մ խորությամբ, քար է ագուցված։ Թվում է, որ հենց սկզբից էլ կամարամահիկը միջանցիկ չի եղել։ Ուշագրավ է, որ դռան կամարի երեսակալի միակ պահպանված հարդարանքը ևս նման է Արջովիտի արևմտյան լուսամուտի պսակի հարդարանքին։

Հուշարձանի կարևոր առանձնահատկություններից մեկն էլ արևելյան և հարավային խաչաթևերում լուսամուտների բացակայությունն է։ Լուսավորման հարցի նման լուծումը հաստատում է նոր Կյանք գյուղի եկեղեցու սերտ առնչությունը վաղ միջնադարի պաշտամունքային կառույցների հետ։ Այսպես, արևելյան խորանում լուսամուտ չունի Զարջառիսի հնագույն միանավ դահլիճը։ Լուսամուտներ չեն ունեցել (միայն հետագայում են բացվել) Արթիկի փոքր և կմբատավանքի եկեղեցիները։ Հուշարձանի հյուսիսային կողմում դռան առկայությունը նույնպես բնորոշ չէ VII դ. գմբեթավոր քառաթև փոքր եկեղեցիներին։

Վաղ շրջանի կառույցների, օրինակ, Նեոնակերտի հետ Նոր Կյանքը առնչվում է մի մասնամասով ևս: Երկուսն էլ արևմտյան ճակատի դռան վերին մասում ունեն կոր վերջավորությամբ զույգ լուսամուտներ, այն տարբերությամբ միայն, որ Նեոնակերտի հուշարձանի լուսամուտի վերին մասը ուղղանկյուն է, իսկ Նոր Կյանքինը՝ կիսաշրջանաձև, երիզված քանդակազարդ պսակով:

Հուշարձանի ներսում հարավային պատի կենտրոնում շրջանագծային խորշ է արված: Ուսումնասիրությունը ցույց է տալիս, որ VI—VII դդ. մեզ հասած գմբեթավոր քառաթև փոքր կառույցներից և ոչ մեկը այսպիսի խորշ չի ունեցել: Ներկայումս առկա փոքր խորշերը ավազանների հետ միասին, փորվել են միայն VII դ. հետո: Մինչդեռ Նոր Կյանքում դրանք նախնական են: Եվ հավանական է, որ հատակից սկսվող այդ խորշի ստորին մասում տեղադրված է եղել մկրտության ավազան (շարժական կամ անշարժ), որը սալահատակի վերականգնումից հետո չի պահպանվել: Ուրեմն, արևելյան խաչաթևում, ուր տեղավորված է խորանը, կատարվել է հիմնական ծիսակատարությունը, իսկ հարավային խաչաթևում, խորշի մոտ՝ մկրտությունը: Կարծում ենք, հենց այս հանգամանքով է պայմանավորված հուշարձանի հորինվածքում լուսամուտների և դռների ինքնատիպ տեղաբաշխումը: Արարողության հետ կապված խաչաթևերը՝ արևելյան և հարավային, լուսամուտներ չունեն և՛ լուսավորվում են միայն հանդիպակաց խաչաթևերի լուսամուտներից, ըստ որում՝ արևելյան խաչաթևի կարևորությունը շեշտված է զույգ լուսամուտներով: Թերևս այս հանգամանքով պետք է բացատրել նաև հյուսիսային խաչաթևում գոհն առկայությունը:

Այսպիսով, հնագույն շինությունների հետ հուշարձանի ճարտարապետական հորինվածքի սերտ առնչությունները (շեշտված պայտաձև թաղեր, եզրակոսներ, արևելյան և հարավային խաչաթևերում լուսամուտների բացակայություն, հյուսիսային դռան կոնստրուկտիվ լուծում, արևմտյան զույգ լուսամուտ) հիմք են տալիս Նոր Կյանքի հուշարձանը թվագրելու VI դ.: Միաժամանակ կառույցում առկա տրոմպային ու առաքաստային փոխանցումների զուգակցումը, որի ամենավաղ թվագրված օրինակը Ավանի տաճարն է (VI դ. վերջ), հնարավորություն է տալիս ավելի կոնկրետացնելու կառուցման ժամանակահատվածը և Նոր Կյանքի հուշարձանը թվագրելու VI դ. երկրորդ կեսով:

Ինչպես այս երկու, այնպես էլ նույն խմբին պատկանող մյուս հուշարձանները մասնագիտական գրականության մեջ անբավարար են ուսումնասիրված և բոլորն էլ թվագրված են VII դ.:

Սակայն Արջովիտի և Նոր Կյանքի հուշարձանները գալիս են հաստատելու, որ դեռևս VI դ., եթե ոչ ավելի վաղ, արդեն գոյություն ունեւր գմբեթավոր քառաթև կառույցների այս տիպը:

Վաղ միջնադարի հայկական ճարտարապետության մեջ այս երկու հուշարձանները եզակի արժեք ունեն ոչ միայն դասական, ճարտարապետության ոբոշ տարրերի պահպանման առումով, այլև ինքնատիպ մանրամասերի մշակումով:

ДВА КРЕСТОВО-КУПОЛЬНЫХ ПАМЯТНИКА АРМЯНСКОЙ АРХИТЕКТУРЫ РАННЕГО СРЕДНЕВЕКОВЬЯ

В. Г. ГРИГОРЯН

Резюме

Рассматриваемые в статье два памятника принадлежат к малым крестово-купольным сооружениям и своими архитектурными особенностями выделяются среди других сооружений данной группы.

Первый из них, церковь св. Геворга, находится в селе Арчовит (ныне Курсали Спитакского района) провинции Ташир-верин исторической Армении. О памятнике нет исторических сведений и он до последнего времени не был изучен и представлен в специальной литературе. Плановым решением, отдельными деталями церковь занимает особое место среди дошедших до нас однотипных сооружений. Некоторые его элементы имеют прямые аналогии с памятниками армянской архитектуры раннего средневековья. Так, западный вход со окновым люнетом напоминает вход храма в Аване, а конструктивное решение южного входа с разгрузочной щелью перекликается с памятниками Лернакерта (IV в.), Ереруйка (V в.), Авана (VI в.). Импосты подкупольных арок имеют свою аналогию в базиликах Ереруйка и Циранавора в Аштараке (V в.), расположенные же над ними кронштейны — в храмах Авана и Мастары (VI в.).

Архитектурные особенности, а также сравнительный анализ церкви Арчовита с памятниками Армении IV–VII вв. позволяют датировать ее первой половиной VI в.

Второй памятник находится в селе Нор Кянк Артикского района. Размерами, плановым решением и конструкцией северной двери он сходен с церковью в Арчовите. Одной из важных особенностей памятника является отсутствие окон на восточном и южном фасадах. Подобное решение вопроса освещения показывает тесные связи архитектуры церкви в с. Нор Кянк с культовыми сооружениями Армении V–VI вв. (Джарджарис, Малая церковь в Артпке, Лмбатаванк). Наличием спаренных окон над западной дверью памятник имеет аналогию с одноапсфной базиликой в Лернакерте (IV–V вв.). Архитектурно-художественный анализ церкви Аствацацин села Нор Кянк позволяет датировать памятник VI в., а факт совместного применения тромповых и парусных переходов, самым ранним примером которого является храм Авана, дает возможность более уточненной датировки (вторая половина VI века). Следует отметить, что как эти два, так и все другие, принадлежащие к этой группе памятники, недостаточно исследованы в специальной литературе и все датированы VII веком. Но представленные нами памятники Арчовита и Нор Кянка приводят к выводу, что еще в VI в., если не ранее, уже существовал в Армении этот тип крестово-купольных сооружений.